

Ils verds smanatschan cun la votaziun dal pievel

Iniziativa per ina economia verda e cuntraproposta indirecta

■ (anr/vi) Ils verds èn indignads pervi da la campagna dad Economiesuisse. Els admoneschan da fixar en la lescha da schanegiar las resursas uschiglio vegnia l'iniziativa per ina economia verda avant il pievel. Oz viva la Svizra uschia ch'i duvrass trais munds sche l'entira populaziun mundiala sfarlatass talmain resursas sco nus. L'iniziativa per ina «economia verda» pretenda che la Svizra reduceschia fin il 2050 ses fastiz ecologic uschia ch'i duvrass mo pli in mund. Il cussegl federal ha formulà ina cuntraproposta indirecta. Tuts chantuns, dano l'Appenzell, beneventan la cuntraproposta. Era tschintg partidas politicas e Coop e Migros van d'accord. Perfin ils verds pudessan viver cun quest cumpromiss e fissan pronts da retrair lur iniziativa rigurusa.

L'economia dovra resursas

La gievgia tracta il cussegl dals chantuns la tematica. La cumissiun da la chombra pitschna gjavischa cun otg cunter tschintg vuschs da gnanc entrar sin la cuntraproposta. Questa tenuta saja «nunchapaivla ed irresponsabla», han ils verds renfatschè ier en ina conferenza da medias. Els fan responsabel l'associaziun d'economia per la tenuta da la cumissiun. «Economiesuisse fa ina campagna cunter l'economia verda cun arguments fitg flaivels», ha ditg ier cussegliera naziunala *Adèle Thorens*. Agir per ina economia verda muntia da s'engaschar per l'economia. Senza resursas na dettia quai la finala a lunga vista nagina economia. Er il cussegl federal concedia il



Adele Thorens, la co-presidenta da la Partida dals verds e Robert Cramer, ses vicepresident a la conferenza da medias ier a Berna.

KEYSTONE

ch'ins stoppia agir areguard las resursas per mantegnair la capaciad economica da la Svizra.

«Ina gronda malchapientscha»

Oz vegnia savens crititgà che pajais sco la China e l'India dovrian adina dapli resursas, ha ditg *Mathis Wackernagel* da l'organisaziun Global Footprint. Questa optica saja ina gronda malchapientscha.

Il problem na sajan gea betg quests pajais, mabain ils industrials che dovrian gia daditg dapli.

«Cura ch'jau sun naschè, pia avant circa 50 onns, ha la Svizra anc produci dapli che quai ch'ella ha duvrà», ha ditg *Wackernagel*. Ma oz vivia la gronda part da la populaziun mundiala en pajais nua ch'ins sfarlatia dapli resursas che quai ch'i sa regenereschia.

La Svizra avess avunda laina

«L'economia verda è il grond tema da l'avegnir», ha ditg cusseglier naziunal *Basien Girod*. En la politica d'ambient fetschian ins anc memia blers sbagls. La bilantscha generala d'automobils electronics saja schleta. Era la politica da gaud na saja betg buna, damai che la Svizra haja en sasez avunda lain ed

importeschia tuttina vinavant. E malgrà tut l'engaschi per il gaud selvadi vegnia anc adina importà lain tropic illegal.

Economiesuisse pretendia ch'ins possia schliar quest problem cun ordinaziuns e ch'i na dovria nagina lescha. Ma sulet l'iniziativa u la cuntraproposta stgaffeschian ina basa solida per scumandar tals imports, ha ditg *Girod*. Las regulaziuns en l'UE sajan en quest regard bler pli lunsch.

Era rimnar plastic?

La cuntraproposta dal cussegl federal vul francar en la lescha la finamira da schanegiar las resursas. La confederaziun avess la cumpetenza d'introducìr in obligatori da rimnar tschertas materialias d'emballadi, sco per exempel chaussas da plastic sco cups da jogurt u butteglas da shampo. Il cussegl federal pudess era relaschar prescripziuns per products ch'engrevgeschan l'ambient.

Il process da s'adattar en la direzziun d'ina economia verda saja il pensum d'ina entira generaziun, scriva il cussegl federal en ses messadi. La moda da viver en ils pajais industrials mainia ad ina surexplotaziun e na saja betg persistenta.